

Ang Pito Ka Mga Dalogdog sa Pinadayag 10

1 Ug unya nakita ko ang laing usa ka manolunda nga kusgan, nga nagakunsad gikan sa langit. Siya sinuloban ug panganud, ug sa iyang ulo dihay usa ka balangaw. Ang iyang nawong maingon sa Adlaw, ug ang iyang mga bitiis maingon sa mga haligi nga kalayo.

2 Ug sa iyang kamot dihay binuklad nga usa ka gamayng basahon nga linukot. Ug ang iyang too nga tiil diha niya itunob sa dagat, ug ang iyang wala nga tiil diha niya itunob sa yuta,

3 ug siya misinggit sa makusog nga tingog maingon sa usa ka leon nga nagangulob; ug sa pagsinggit niya, mitingog ang pito ka mga dalogdog.

4 Ug sa nakatingog na ang pito ka mga dalogdog, isulat ko na unta kini, apan akong nadungog gikan sa langit ang usa ka tingog nga nag-ingon, “Ililong ang gisulti sa pito ka mga dalogdog, ug ayaw kini isulat.”

5 Ug ang manolunda nga akong nakita nga nagtindog sa dagat ug sa yuta mibayaw sa iyang toong kamot ngadto sa langit

6 ug nanumpa pinaagi niadtong buhi hangtud sa kahangturan, nga mao ang nagbuhat sa langit ug sa mga ania niini, sa yuta ug sa mga ania niini, ug sa dagat ug sa mga ania niini, nga wala na gayuy langanlangan pa,

7 hinonoa nga sa mga adlaw sa tingog sa trumpeta inighuyop niini sa ikapitong manolunda, pagatumanon na ang tinago sa Dios, sumala sa iyang gipahibalo ngadto sa iyang mga ulipon nga mao ang mga profeta.

Pinadayag 10:1-11 (dinhi verseculo 1-7)

Apan hinumdomi, si Daniel gisuginlan sa Manulonda. Si Daniel nakadungog sa pito ka mga dalogdog; sila mitingog. Mipunit si Daniel sa iyang pluma ug isulat unta kini, ug ang Manulonda miingon, “Ayawg isulat kini.” Amen. *Daniel 12:4,9.*

Andam na ba kamo? Moadto kita ngadto niini sa mosunod nga mga lima ka minuto. Buot ba kamo? Paminaw.

Ayawg isulat kini.” Si Juan nakakita sa mao gihapon nga butang, ug kini nasulat sa likod sa Biblia; ug adunay pito ka mga timri sa luyo sa Basahon, nga walay tawo nga makahimo sa pag-abli nianang mga timri, nga mao kanang mga tingog. Dinhi ang Biblia gisulat, nga sa Iyang kaugalingon usa ka tinago. Apan sa likod sa Biblia, ang mga pinadayag gipakita ngadto kang Daniel, miingon nga adunay pito ka mga tingog nga walay tawo nga makahimo sa pag-abli, walay tawo nga mahibalo kung unsa kini. Apan ang Biblia miingon, ug gisuginlan si Daniel ug si Juan usab. “**Nga sa katapusang mga adlaw kining pito ka mga tingog mapadayag sa tinuod matuod nga Iglesia.**” Nakuha ninyo kini? Makita ba ninyo diin ang mini ug palsipikado nagatinguha sa ilang pinakamaayo sa pagpugong sa dagkung mga tawo gikan sa mga dapit sama niana? ^[1]

Karon kining mensahero sa *Malaquias 4:5-6* ug *Pinadayag 10:7* magabuhay sa duha ka mga butang. Nahauna: **Sumala sa Malaquias 4** siya magapabalik sa mga kasingkasing sa mga anak ngadto sa Amahan. Ikaduha: Siya magabutyag sa mga tinago sa pito ka mga dalogdog sa Pinadayag 10 nga mao ang mga pinadayag nga anaa sa pito ka mga timri. Mao kining Diosnong napadayag nga ‘tinagong-mga kamatuoran’ nga literal nga mopabalik sa mga kasingkasing sa mga anak ngadto sa Pentecostal nga mga amahan. Sa tinuod gayud. ^[2]

Buyno, ania dinhi ang mga “tingog.” Oh, giunsa nato sa pagkinahanglan ang kaliboan ka **buhing mga tingog sa Dios nga magadalogsog diha sa katam-is, ug sa pagkabalaan, kaputli, wala mahugawi nga mga kinabuhi, nagalakaw palibot sa yuta karong panahona nga walay buling. Oo, sir, tinuod nga mga Cristohanon, nga magadalogsog batok sa kaaway.** Ang Yawa dili manumbaling kung unsa ka kusog ikaw mosinggit; ang Yawa dili manumbaling kung unsa ka daghan ikaw moambak, unsa ka daghan ikaw mobuhay niini kon mosinggit. **Apan ang makapasakit sa yawa mao ang makita kanang nabalaan, balaang kinabuhi nga gialagad ngadto sa Dios; isulti ang bisan unsang butang ngadto kaniya, tawagon siya sa bisan unsang butang, ingon ka matam-is gayud kini ug magapadayon. Oh, tan-awa. Makapalagpot kana kaniya; mao kana ang dalogsog nga makapatay-og sa Yawa.** [3]

Ug kining pito ka pilo nga Basahon sa mga plano sa pito ka katubsanang gihatag kanato, ug mao kana kung unsa ang gikuptan niining Basahon. Karon, moadto kita aron kuhaon ang ika-10 nga kapitulo diin kining gamhanang Manulonda nagamantala ug usa ka butang, ug Siya adunay gamayng Basahon nga pagakaonon ni Juan. Ug sa dihang iyang nakaon kini, sa iyang tiyan kini mapait, apan sa iyang mga ngabil kini matam-is (*Pinadayag 10:8-11*).

Sa dihang imong mahilis Kini, nan kini magsugod sa pagkapait, ang tanan mobatok kanimo, ang tanan mosulti “Ikaw usa ka holy-roller, ikaw mao kini, kana, kon uban pa. Nakita ninyo, ikaw nawad-an sa pangisip.” Busa malisod pagahilison Kini; **apan sa dihang ikaw magpamatuod sa Iyang himaya,** Kini matam-is sa imong mga ngabil. Mao kanang tanan. Nakita ninyo? Ug sa dihang ikaw motindog sa tigum, ikaw moingon, “Himaya sa Dios. Hallelujah...” Oh, sa dihang ikaw molatas nianang dakung pag-asdang, kini malisod; apan sa dihang ikaw makalingkawas nianang dakung pag-asdang ikaw makapamatuod mahitungod niini, unya Kini matam-is sa imong mga ngabil. Nakita ninyo? Tinuod kana. Mao kana kining Basahong sa katubsanang.

Ang pito ug katapusang usa niining mga timri, sa dihang sila pagaablihan, makaplagaan sa Mga Pinadayag sa ika-10 nga kapitulo; adunay usa ka gamhanang Manulonda (nga mao si Cristo) mikanang ug gitunob ang usa ka tiil sa yuta ug ang usa sa dagat, ug mibayaw sa Iyang kamot, ug miingon, “Ang panahon natapos. Dili na malangay ang panahon. Natapos na. Wala nay panahon.”

Ug Siya misulti sa pagtingog sa... Niining panahona ang tinago sa Dios matuman na: **Kinsa ang Dios, ug giunsa Niya sa pagpadayag; giunsa sa pag-abli nianang timri, giunsa nato sa pagsugod sa pagkahibalo karon nga Siya mao ang Anak sa Dios; Siya ang Dios sa Iyang kaugalingon nga nahimong unod; ug ang pinadayag kung Kinsa Siya; kana matuman na sa dili pa kining Manulonda motunob sa Iyang tiil sa yuta ug dagat ug manumpa nga wala nay panahon sa dihang kini moabut.** Kita anaa na gayud sa atubangan niini karon.

Ang katapusang usa kanila mao ang Mga Pinadayag 10, ang tiil anaa sa yuta ug sa dagat; wala nay panahon; ang katubsanang natapos na; karon Siya moanhi ingon nga Leon. Siya Karnero kaniadto; karon Siya mianhi ingon nga Leon sa banay ni Juda. [4]

Mao ba kana? Ang gamhanang dalogsog, kon ang ikapito nga manulonda diha sa ikapitong hugpong, ikapitong hugna sa hugpong, ang piramid nga nahimo diha sa porma, tulo sa matagkilid, ug usa sa ibabaw, ug sila gikan sa eternidad. Mao ba kini? **Mao ba kini ang tinago sa mga dalogsog nga mobalik sa Ulohang bato?**

Ug nahibalo kamo, ang piramid wala gayud mataklobi. Ang Ulohang bato moabutay pa. Gisalikway Kini. Mao ba kini, igsoong mga lalake, mga babaye? [5]

Nahinumdoman ba ninyo ang akong mensahe dinhi? Ang pag-abli nianang “Batong Taklob” diin kanang Pito ka mga Tingog wala gani gikasulat diha sa Pulong sa Dios. Nahinumdoman ba ninyo? Ug kini mipasulod kanako ngadto nianang piramid. Ug Junior Jackson, kanang damgo nga imong gihatag kanako dili pa lang dugay... Pasayloa ako sa dili paghatag kanimo sa hubad, tungod kay nakakita ug usa ka butang nga nagalihok. [6]

Kung unsa ang atong nakita nga mahitabo kinahanglan magbutang sa matag kalag diha sa paglihok. Makapahimo kini sa iglesia sa paghimo ug rebaybal dinhi sa Phoenix, nga ang katawhan molupad paanhi gikan sa Europe aron makita kung unsa ang mahitabo. Sila moingon, “Adunay usa ka dapit sa Arizona nga gitawag nga Maricopa Valley, usa ka syudad nga gitawag nga Phoenix. **Adunay usa ka butang nga mitungha didto hangtud ang pito ka mga dalogdog sa Mga Pinadayag 10, nga wala gani nasulat diha sa Biblia, nga nahimong napadayag.**” [7]

Ania kita sa pagtudlo, ug kamo makaamgo kung unsa ka dakung pakigbisog kini alang kanako, tungod kay kung ako magtudlo ug bisan unsang butang nga sayup, manubag ako alang niini. Nakita ninyo? Ug tungod niana dili ako modawat sa isulti ni bisan kinsa; **kini kinahanglan dinihugan. Ug ako mitoo nga ang Pito ka mga Manulonda nga mikupot niining pito ka mga dalogdog magatugot niini.** [8]

Kining pito ka natimrihan nga Basahon igapadayag sa panahon sa Pito ka mga Dalogdog sa Mga Pinadayag 10. Karon, ang tinago niining pito ka natimrihan nga Basahon igapadayag sa pagtingog sa mensahe sa manulonda sa ikapitong iglesia. Nakita ninyo? Ang ikapitong manulonda magsugod sa pagtingog, ug anaa ang mga mensahe gikasulat dinha, ug atong nabatonan kini diha sa teyp ug basahon nga porma.

Karon, apan kini usa ka Basahon, usa ka mysteryoso nga Basahon. Mao kini ang Basahon sa Katubsan. Ug karon, nahibalo kita nga kining Basahon sa Katubsan dili masabtan ug maayo: giusisa kini latas sa unom ka kapanahonan sa iglesia, apan sa katapusan, sa dihang ang ikapitong manulonda magasugod sa pagtingog sa iyang tinago, **iyang tibawason ang tanang wala matapos nga mga butang** nga giusisa niining mga tawo, **ug ang mga tinago nga mikanaug gikan sa Dios maingon nga Pulong sa Dios ug magbutyag sa tibook pinadayag sa Dios.** Unya ang pagka-Dios ug tanang butang pa masolbad. Ang tanang mga tinago: ang kaliwat sa bitin ug bisan unsa pa mapadayag.

Karon, makita ninyo, ako wala maghimohimo niana. Mao kana ang **MAO KINI ANG GIPAMULONG SA GINOO.** Akong basahon kini kaninyo gikan niining Basahon: sa pagtingog sa mensahe sa ikapitong manulonda, ang tinago sa Dios pagatumanon na, sumala sa iyang gipahibalo ngadto sa Iyang balaang mga profeta. Mao kana ang mga profeta nga nagsulat sa Pulong. Sa pagtingog sa ikapitong kapanahonan sa iglesia, ang katapusang kapanahonan sa iglesia, ang tanang wala matapos nga mga butang nga giusisa latas niining mga kapanahonan sa iglesia, tanan pagatapuson. Ug sa dihang ang mga Timri maablihan ug ang tinago mabutyag, ang Manulonda mokanaug, ang Mensahero, si Cristo, motunob ang Iyang tiil sa yuta ug sa dagat nga adunay balangaw sa ibabaw sa Iyang ulo. **Karon hinumdomi, kining ikapitong Manulonda anaa sa yuta sa panahon niining pag-anhi.** [9]

Ug sa katapusan sa Pentecostal nga kapanahonan kita gitooang makadawat, sumala sa Pulong, maingon nga ang Dios magatabang kanako sa pagpakita dinhi, nga kita makadawat ug usa ka mensahero nga magatapos sa tanang wala matapos nga mga butang **ug magabutyag sa tibook tinago sa Dios alang sa pagsakgaw sa iglesia.**

Ug unya adunay pagtungha sa pito ka mysteryosong mga dalogdog nga wala masulat gayud. Tinuod kana. **Ug ako nagatoo nga pinaagi nianang pito ka mga dalogdog nga igapadayag sa katapusang mga adlaw aron makabaton ang Pangasaw-onon sa pagsakgaw nga pagtoo; tungod kay ang atong nabatonan karon, kita dili makahimo sa pagbuhat niini. Adunay usa ka butang nga kita kinahanglan motikang sa unahan; kita halos wala gani igong pagtoo alang sa Diosnong kaayohan. Kinahanglan kita adunay igong pagtoo nga mausab sa usa ka gutlo ug malalin gikan niining yuta,** ug atong makaplagaan kana taudtaud, itugot sa Ginoo, makaplagaan kung asa kini nasulat.

Busa si Juan miadto sa pagtan-aw, mitan-aw kung unsa kadto. Tungod niana kining binuhat misulti kang Juan nga moadto ug tan-awon kung unsa ang tinago ilalum sa Nahaunang Timri. **Ang dalogdog, ang tingog sa Magbubuhat ang misulti niini.** Karon, siya angayng mahibalo kung unsa ang anaa didto. Amen. Oh, tan-awa.

Apan hunahunaa, karon iyang isulat kini, apan sa dihang siya nagsugod sa pagsulat nianang laing pito ka mga dalogdog, siya miingon, “Ayawg isulat kini.” Siya gisugo sa pagsulat sa tanang butang nga iyang nakita (*Pinadayag 1:10-11*). Apan sa dihang kining pito ka mga dalogdog sa Mga Pinadayag 10 misulti, siya miingon, “Ayawg isulat sila gayud.” **Ang mga tinago. Wala pa kita nahibalo kung unsa sila; apan sa akong pagsabut sila ipadayag dihadhiha. Ug sa dihang kini mabuhat, kini magahatag ug pagtoo alang sa pagsakgaw nga grasya alang nianang Iglesia sa paglalin.** Kita nagairog gayud latas sa tanang butang nga atong nahibaloan; latas sa tanang mga dispensasyon kita nakatan-aw sa tanang butang. Atong nakita ang mga tinago sa Dios. Atong nakita ang pagtungha sa dakung tigum sa Pangasaw-onon sa katapusang mga adlaw, apan bisan pa niana adunay usa ka butang diha niana nga kita dili pa gayud mahayagan. **Adunay laing usa ka butang. Apan akong gihunahuna sa dihang ang mga tinago magasugod sa pagtungha...** Ang Dios miingon, “Pugngi kini karon. Pagpaabut sa makadiyot. Akong igabutyag kini nianang adlaw. Ayawg isulat kini gayud, Juan, tungod kay sila magakalibog niini. Pasagdi lamang kini. **Apan Akong igabutyag kini nianang adlaw sa dihang kini kinahanglan nga buhaton.**”

Pito ka mga dalogdog sa pinadayag... **Hinaut Iyang ipakita sa Pangasaw-onon kung unsaon sa pag-andam alang sa dakung pagsakgaw nga pagtoo.** Karon, atong pangitaon ang mga simbolo. Atong nakaplagan kung unsa ang ipasabut sa mga dalogdog. Mao kana sa hingpit; kita nahibalo niana. Nakita ninyo? **Ang dalogdog mao ang tingog sa Dios sa dihang ang Timri naablihan.** ^[10]

Dios, tabangi ang among pagkadili matinoohon! Kuhaa kini gikan kanamo, Ginoo! Buot kami modawat sa pagsakgaw nga grasya. Buot kami nga makahimo, **sa dihang kanang misteryosong dalogdog modalogdog didto sa unahan,** ug ang Iglesia pagasakgawon, buot kaming maandam sa pagdawat Niini. Ginoo, tugoti kini. ^[11]

Ang Pangasaw-onon wala pay rebaybal. Wala pay rebaybal, **wala pay pagpadayag sa Dios nga makapaukyab sa Pangasaw-onon.** Nakita ninyo? Kita nagapaabut niini. **Kanang pito ka wala mailhi nga mga dalogdog mao ang makapapukaw kaniya pag-usab.** Iyang ipadala kini. Siya nagsaad niini. Karon, karon, bantayi. Karon, siya patay. ^[12]

Karon, ang ika-8 nga capitulo ang makabutyag lamang sa talan-awon sa Ikapito nga Timri diin walay bisan unsa nga gibutyag. **Karon, walay bisan unsa nga gibutyag sa Ikapito nga Timri.** Karon, walay kala-butan sa ika-7 nga capitulo sa Pinadayag. Ang pagbutyag sa Ikapito nga Timri sa hingpit hilom. **Ug kung ako adunay panahon lamang (Akong tinguhaon sa pipila ka mga dapit.) sa pagpakita kaninyo balik gayud gikan sa Genesis nga gihisgutan niining Ikapito nga Timri.** Gikan gayud sa sinugdan sa Genesis, kining ikapito—kining mga Timri nagahisgut.

Kanang hingpit nga numero, pito ka mga dalogdog nga nagpasunod, misulti dili lamang sa paghimo niini sa usa, duha, tulo, upat, lima, unom, pito, deretso. Tungod niana ang mga langit dili makasulat niana. Ang mga langit wala mahibalo mahitungod niini, walay bisan unsa pa, tungod kay walay bisan unsa nga nahitabo. **Mao kini ang pagpahulay nga panahon.** Daku kaayo kini nga kini gitago gikan sa mga Manulonda.

Karon, karon, namatikdan ba ninyo **sa pag-abli niining Ikapitong Timri, kini usab tulo ka pilo nga tinago.** Kining usa nga akong nabatonan—ipamulong ug napamulong, **nga mao kini ang tinago sa pito ka mga dalogdog. Ang pito ka mga dalogdog sa langit magabutyag niining tinago. Kini mahitabo gayud sa pag-anhi ni Cristo,** tungod kay si Cristo miingon nga walay nasayud sa dihang Siya mobalik.

Namatikdan ba ninyo sa dihang ang mga Judio nangutana Kaniya niana? Nahibalo ba kamo sa dihang atong gitandi ang Kasulatan dinhi sa Mateo 24 uban sa sa unom ka mga Timri, ang Ikapito nga Timri wala giapil; tungod kay, si Cristo miingon nga ang Dios lamang ang nasayud, wala bisan gani ang mga Manulonda. Dili ikatingala, wala kini gisulat. Inyong makita, sila mihilom; walay bisan unsa nga nahitabo. Ang mga Manulonda wala nahibalo niini; walay nahibalo kung kanus-a Siya moabut. apan **adunay pito ka mga tingog niining mga dalogdog nga magabutyag sa dakung pinadayag nianang panahon.**

Busa ako nagatoo, kanato nga... Kung wala kita nahibalo niini, ug kini dili mahibaloan hangtud nianang panahon, apan kini igabutyag niana nga adlaw, sa takna nga gitooan nga ibutyag kini. **Busa ang butang nga atong buhaton mao ang magmapaubsanon atubangan sa Dios ug mag-alagad Kaniya, ug buhaton ang tanan nga atong nahibaloan nga buhaton, ug magkinabuhi nga maayong Cristohanon.**

Dinhi karon, atong makaplagan nga ang Ikaunom nga Timri naablihan kanato; atong nakita kini, ug **kita nahibalo nga kining Ikapito nga Timri dili mabuksan ngadto sa publiko hangtud sa pag-abut nianang takna.**

Karon, adunay ubang hinungdan nga ang Dios nagtugot niining pito ka mga tingog nga modalogdog, tungod kay kinahanglan kini moabut, alang sa... Atong nakaplagan nga si Cristo, ang Karnero mikuha sa Basahon diha sa Iyang kamot, ug Iyang giablihan ang Ikapito nga Timri. Apan inyong makita, usa kini ka natago nga tinago. Walay usa nga nasayud niini. Apan subay gayud kini sa Iyang gisulti: walay usa nga nasayud sa Iyang pag-anhi; sila usab wala nahibalo mahitungod niining tinago sa pito ka dalogdog. Busa inyong makita, kini magkadugtong.

Mao kana ang atong pagsabut niini karong panahona, tungod kay ang uban niining tanan nabutyag, apan kini wala nabutyag. Apan sa nagalingkod sa akong lawak, ug akong nadunggan kini—kon wala madunggi kini, diay, **apan nakita kini nga nabutyag ngadto niining pito ka mga dalogdog.** Karon, mao kana kutob sa kalayo nga kita makaadto gayud didto. Ug karon ako nagasalig nga ang matag-usa kanato magaalagad sa Dios, ug magabuhat kung unsay maayo, ug higugmaon Siya sa tibook ninyong kinabuhi ug magaalagad Kaniya, ug ang **Dios magaatiman sa uban.**

Karon, kita nakabaton sa kahumanan dinhi karon, pinaagi sa grasya sa Dios, ang tanang mga tinago sa unom ka mga Timri nga gitimrihan, ug kita nakasabut ug nahibalo dinhi **nga ang Ikapito nga Timri wala gipahibalo ngadto sa publiko.**

Karon, kung unsa kining dakung sekreto nga napahiluna ilalum niining Timri, wala ako nahibalo. Ako wala nahibalo niini. Dili ako makahimo niini. Dili ako makasulti niini, kung unsa gayud kini ug unsa gayud ang gisulti niini. Apan nahibalo ako nga **silang mga pito ka mga dalogdog nga misulti nga nagsunodsunod gayud,** nga mibuto gayud sa pito ka nakalainlaing mga higayon, ug **kini nagbutyag ngadto sa ubang butang pa nga akong nakita.**

Nakita ang Israel nga nagkatigum diha sa iyang kaugalingong yutang pinuy-anan. Apan namatikdan ba ninyo, wala Niya giapil ang pinadayag niining Ikapito nga Timri. Ug dinhi sa dihang ang Ikapito nga Timri, sa dihang Iyang giablihan kini, wala usab Niya giapil kini pag-usab. Nakita ninyo? Busa atong makita nga kini usa ka hingpit nga tinago, tungod niana, ang takna dili pa alang niining tinago nga mahibaloan, tungod niana, kita ania niini ka halayo **ug ang uban niini mahibaloan sa panahon gayud nga si Jesus motungha pag-usab sa yuta alang sa Iyang Pangasaw-onon, kon bisan unsa ang mahitabo nianang panahona.**

Karon, hangtud nianang panahona, kitang tanan magaampo lamang ug magkinabuhi nga maayong Cristohanon nga pagkinabuhi, nagapaabut sa Iyang pag-anhi.

Ug karon, kung kining teyp mahitabo nga makaabut ngadto sa mga kamot sa ubang mga tawo sa ubang dapit, ayawg pagtinguha sa paghimo ug bisan unsang matang sa “ismo” gikan niini. Ang butang lamang nga inyong buhaton, **kamo magapadayon lamang sa pag-alagad sa Dios,** tungod kay kining dakung sekreto daku kaayo nga ang Dios wala gani motugot kang Juan sa pagsulat niini. Kini midalogdog, apan Siya nagasaad kanato nga kini maablihan, apan ngadto niining panahona, kini wala maabli. ^[13]

Karon, **ang Dios adunay katuyoan ug natago nga tinago.** Ug mao kana ang buot kong ipamulong ngadto sa iglesia: **ang natago nga tinago sa Dios nga anaa sa Iyang hunahuna sa wala pa matukod ang**

kalibutan ug giunsa nga kini nabutyag sa iyang kaugalingon ngadto niining taknaa nga atong gikinabuhian. Unya inyong masabtan sa tin-aw gikan niana, ako nagatoo, kung unsa ang nabuhat.

Ang dakung tinago sa Dios kung giunsa... Usa kini ka sekreto. Iyang gisekreto kini. Walay nahibalo mahitungod niini; bisan ang mga Manulonda dili makasabut niini. Nakita ninyo? Wala Niya gibutyag kini. **Mao kana ang hinungdan ilalum sa atong ikapito nga tinago, sa dihang ang ikapito nga timri giablihan, adunay kahilom.**

Si Jesus, sa dihang Siya ania dinhi sa yuta, sila buot mahibalo kung kanus-a Siya moanhi. Siya miingon, “Bisan ang Anak sa Iyang kaugalingon wala nahibalo kung kanus-a kini mahitabo.” Nakita ninyo, ang Dios nagbaton niining tanan sa Iyang kaugalingon. Sekreto kini. Ug mao kana ang hinungdan nga adunay kahilom sa may tunga sa takna. **Ug ang pito ka mga Dalogdog mitingog, ug si Juan wala tugoti sa pagsulat niini—sa pag-anhi sa Ginoo.**

Mao kana ang usa ka butang nga wala pa Niya gibutyag, **sa unsa nga Siya moanhi, ug kanus-a Siya moanhi.** Usa kini ka maayong butang nga wala Niya buhata. Dili. **Iyang gipakita kon gibutyag kini diha sa matag tipo nga anaa sa Biblia.**

Tungod niana, ang tibook Biblia mao ang pinadayag sa tinago sa Dios diha kang Cristo. **Ang tibook Biblia mao ang pagpahayag sa usa ka tumong sa Dios,** usa ka katuyoan nga matuman diha sa tibook Biblia, ug ang tanang mga buhat sa mga magtotoo diha sa Biblia nahimong tipo ug nagpadayag kung unsa ang dakung katuyoan sa Dios. Ug karon dinhi niining katapusang adlaw Iyang ibutyag kini ug ipakita kini. Ug sa tabang sa Dios, atong makita kini dinhi: kung unsa ang anaa sa hunahuna sa Ginoo ug ipahayag kini. Tungod niana, inyong makita ang dakung kahulogan sa unsay nahitabo nga mahibalo niini ug unya tinguhaon sa pagdala niini ngadto sa katawhan. Nakita ninyo? Ug unya kamo dili... Wala ako makaadto sa mga detalye ug magtinguha sa pagsaysay niini samtang ang Dios magapadayag niini kanako.

Karon, ang pag-anhi sa Ginoo usa ka tinago. Wala kita nahibalo kung kanus-a Siya moanhi, unsaon Niya pag-anhi, apan kita nahibalo **nga Siya moanhi. Nakita ninyo? Ug mao usab ang tanang mga tinago sa Dios nagapaabut niining katapusang adlaw. Human nga kini makompleto na unya Iyang ibutyag, Iyang ipakita kung unsa ang iyang nabuhat.** Oh, tan-awa. Wala gayud magahatag sa Iyang tinago sa kinatibok-an...

Sama gayud niini, pagtandi sa Pito ka mga Timri. Karon, sa dihang ang Dios naggamit kang Martin Luther sa pagpanggula, alang nianang nahaunang iglesia (kanang kapanahonan sa iglesia), ug sa dihang Iyang gigamit si John Wesley, **ug sa inanay Iyang gipagula sila** ug nagbutyag kanila nianang kapanahonan sa iglesia. Sa dihang bisan kinsa mobalik sa Biblia karon ug makaplagan... Apan sa katapusang mga adlaw...

Ang hinungdan nga usa kini ka talagsaong butang, nga Siya namulong mahitungod niini dinhi ug gipakita kanang Pito ka mga Dalogdog ug ang “Look” ug ang “Life” magasin didto, nagmantala nianang liyok sa panganod ug kahayag didto nga sila dili makasabut ug wala pa nahibalo niini, apan dinhi nagasulti, “Umadto didto ug magpaabut niining mga tinago nga mabutyag” ug dinhi mga bulan sa wala pa kini mahitabo; ug unya nahitabo kini, ug sa tukma gayud sa paagi nga Iyang gisulti kini nga pagabuhaton.

Namatikdan ba ninyo diha nianang hulagway bisan kanang Manulonda diha sa too sa dihang Siya mipakita, mikanaug, uban sa Iyang mga pako sa likod ug ang Iyang ulo pinakilid? Diha gayud niana diha sa hulagway sa tukma gayud: mga bulan sa wala pa kini nahitabo, nagsugilon dinhi nga Iyang pagadal-on ang Lawas sa mga magtotoo nga magkahiusa aron ibutyag, pagahisgutan ang mga wala pa natapos nga mga butang. [14]

Ang tanan, sila sa kanunay moanhi kanako, moingon, “Brother Branham, silang mga pito ka mga dalogdog nga ang tingog midalogdog, ug siya miingon ‘Ayawg isulat kini, apan sirad-i kini,’ miingon, “mao

ba kana ang pito ka mga dalogdog nga ibutyag sa katapusang mga adlaw? Nakita ninyo, pito ka mga dalogdog nga magatug-an kanato?” Karon, kana dili sa tinuoray maayong pamation? Nakita ninyo? Apan bantayi kung unsa ang imong gisulti sa dihang ikaw mosulti niana. Siya miingon, “Tan-awa nga wala nimo masulat kini.” Kining pito ka mga dalogdog mitingog, ug Siya miingon, **“Ayawg isulat kana, apan Kini pagatimrihan diha sa Basahon hangtud sa katapusang mga adlaw.”**

Karon, adunay, daghan ang misulti kanako, ang mga teyologo miingon, “Brother Branham, kung ang Ginoong Dios...” Miingon, “Kung uban sa imong kasinatian nga gihatag sa Ginoo kanimo alang sa Iyang katawhan,” sa mapainubsanon mosulti niini, miingon, “Ikaw takus nga makasulat ug Biblia sa imong kaugalingon, ang imong Pulong nga gipadayag sa Dios.”

Ako miingon, “Tingali tinuod kana.” Nakita ninyo, siya nagtinguha sa pagdakop kanako, “Apan, imong makita, dili ako makahimo sa pagbuhat niana.”

Siya miingon, “Nganong dili? Imong nabatonan ang tanang katakus.”

Ako miingon, “Apan, tan-awa, walay usa ka pulong nga madugang kon makuha.” (*Pinadayag 22:18-19*). Nakita ninyo?

Ug siya miingon, “Buyno unya, **silang mga pito ka mga dalogdog,**” miingon, “dili ba silang **pito ka mga dalogdog** nga mibuto, dili ba kana pinadayag nga ihatag ngadto sa ubang tawo?”

Ako miingon, “Dili, sir, kini mahimong modugang ug ubang butang ngadto Niini kon pagkuha ug ubang butang gikan Niini.” Kining tanan nabutyag didto, ug ang pito ka mga timri mibukas sa pinadayag kung unsa kana. Nakita ninyo?

Siya sa gihapon anaa sa Pulong. Nakita ninyo, dili ka makagawas nianang Pulong. Kini dili mobiya sa Pulong. Ug ang Espiritu sa Dios dili gayud mobiya nianang Pulong. Magpabilin gayud Kini sa Pulong, nagabuta sa uban ug nagapabuka sa mga mata sa uban. Kini sa kanunay nagabuhat niana.

“Kamo mao ang nasulat nga mga basahon, nga mabasa sa tanang mga tawo” (*II Cor. 3:2*), kon, “Kamo mao ang among...” Maghubad niana, balihon kini niini nga paagi, balihon lamang Kini, **“Kamo mao ang mga basahon nga nasulat,”** tungod kay dili ka makadugang ngadto Niini, “nga mabasa sa tanang mga tawo.” “Napadayag nga Pulong sa Dios,” sa laing pagkapulong. ^[15]

Tan-awa. Buot ako mosulti ug dugang usa ka butang. Paminaw ug maayo karon, ayawg sipyata kini. Unsa ka makahibulong. **Gikan sa ikapitong Mensahe (ug ang Mga pinadayag 10 mao ang Ikapito nga Timri) sa manulonda (mensahero sa Ikapitong timri) ngadto sa Pito ka mga Trumpeta, taliwala nianang mga panahon...**

Karon, sa dihang kining Iglesia, ang Pangasaw-onon pagatigumon, **siya pagasakgawon; diha nianang tinago sa Ikapitong Timri, kon sa Ikapitong Timri, ang tinago nagapadayon.** Ug ang mga Judio gitawag pinaagi sa tinago sa Ikapitong Trumpeta, nga mao ang duha ka mga profeta, si Elias ug si Moises. ^[16]

Magpaabut hangtud silang pito ka mga dalogdog motingog ngadto nianang pundok nga sa tinuoray makadawat sa Pulong sa Dios modala niini didto. Kini mohiwa ug moputol. **Ug sila makahimo sa pagsira sa mga langit; sila matak-op niini kon mobuhat niana, bisan unsa nga buot nila.** Himaya! ^[17]

Ang pito ka mga dalogdog nga tumbas sa pito ka mga tinago nabutyag na ba? Nabutyag ba sila diha sa pito ka mga Timri, apan wala pa napahibalo kanato ingon nga mga dalogdog?

Dili, sila nabutyag diha sa pito ka mga Timri; mao kana kung unsa ang mahitungod sa mga dalogdog. Sila ibutyag... Ang pito ka mga dalogdog nga mitingog ug walay usa nga makahimo kung unsa kadto... **Si Juan nahibalo kung unsa kadto, apan wala tugoti sa pagsulat niini.** Siya miingon, **“Apan ang ikapito nga manulonda, sa mga adlaw sa iyang pagtingog, ang pito ka mga tinago sa pito ka mga dalogdog ibutyag.”** Ug ang ikapito nga manulonda mao ang mensahero sa ikapito nga kapanahonan sa iglesia. ^[18]

Mao kana ang katapusang panahon nga ang pito ka mga dalogdog ni Jesus motungha. Pinadayag 10:3-4, *“Ug misinggit siya sa dakung tingog, ingon sa leon nga nagangulob. Ug sa nakasinggit siya ang mga tingog sa pito ka mga dalugdug nanagsulti. Ug sa nakasulti ang mga tingog sa pito ka mga dalugdug, buot ko unta nga sulaton, ug akong hingdungan ang usa ka tingog sa langit, nga nagaingon kanako: Tagoan mo ang mga butang nga gisulti sa pito ta mga dalugdug, ug dili mo isulat.”* Unsa ang anaa nianang mga dalogdog walay nahibalo. **Apan kinahanglan kita nga mahibalo. Ug nagkinahanglan kini ug profeta nga makakuha sa pinadayag tungod kay ang Dios walay laing paagi sa pagdala sa Iyang Kasulatang mga pinadayag gawas sa profeta.** Ang Pulong sa kanunay moabut ngadto sa profeta ug sa kanunay gayud.

Busa atong makita ang mensahero sa ikapitong kapanahonan nga moabut, ug siya usa ka profeta.

Dili lamang nga atong makita kining mensahero nga motungha dinhi sa *Pinadayag 10:7*, apan atong makaplagan nga ang Pulong nagapamulong kang Elias nga moabut sa dili pa mobalik si *Jesus (Mateo. 17:9-13)*. ^[2]

Matikdi, ang Dios misulti sa profeta, miingon, “Kan-a ang linukot nga basahon,” sa Daang Tugon (Ezequiel 3:1-3). Ang profeta sa Bag-ong Tugon, Siya miingon, “Kaona ang gamayng basahon.” Ngano? Nga ang profeta ug ang Pulong mahimong usa. Nakita ninyo? Mao kana ang Arka, ang Pulong sa Dios. ^[19]

Minahal nga Dios, niining mahinuklogon nga gutlo, **adunay mahimong sama niining panahon sa dihang adunay tinuoray nga paglagapak sa dalogdog sa umalabot nga adlaw, ug ang Anak sa Dios mokanaug gikan sa mga langit uban sa pagsinggit, uban sa tingog sa Punoang manulonda, ug sa trum-peta sa Dios, ang patay diha kang Cristo mobangon.** Ug ang matag-usa kanamo mahibalo ug makamatngon, Amahan, nga kami manubag sa matag pulong ang among igahatag, ang matag pulong nga among ipamulong. Bisan ang mga hunahuna nga anaa sa among mga kasingkasing, kami manubag niini. Ako nagaampo Kanim, Dios, sa Ngalan ni Jesus, nga Ikaw magahinlo sa matag kasingkasing nga ania dinhi. hinloi ang akong kasingkasing, hinloi ang mga kasingkasing niining katawhan. Ug hinaut kami maandam, Ginoo, ug **hinaut mabuka ang among espirituhanong mga mata aron makita ang Himaya sa Labing gamhanang nga Dios.** Among napatalinghugan Siya, O Amahan, Dios, kami nagaampo nga Ikaw magatugot kanamo nga makakita Kaniya. Tugoti kini, Amahan. Tugoti kining mga panalangin, ako nagaampo, pinaagi sa Ngalan ni Jesu-Cristo. Amen.

^[20]

Reperensya:

- [1] "Pinadayag, Basahon sa mga Simbolo" (56-0617). Par. 64
- [2] "Kapanahonan sa Iglesia sa Laodicea", Basahon sa Kapanahonan sa Iglesia pahina 327 ug 324
- [3] "Pinadayag Capitulo 4 Bahin 3, Trono Sa Kalooy" (61-0108), par. 120
- [4] "Pinadayag Capitulo 5 Bahin 2" (61-0618), par. 100-207
- [5] "Mao Ba Kini Ang Ilhanan sa Katapusan, Sir?" (62-1230E), pahina 48
- [6] "Ang Pagtamay Alang Sa Pulong" (62-1223) pahina 8
- [7] "Inpluwensya" (63-0112), par. 146
- [8] "Ang Dios Nagtago Sa Iyang Kaugalingon Diha Sa Kayano" (63-0317M), pahina 18
- [9] "Ang Gintang" (63-0317E), pahina 72-74
- [10] "Ang Nahaunang Timri" (63-0318), pahina 128; 141-142; 155
- [11] "Ang Ikaduhang Timri" (63-0319), par. 351
- [12] "Ang Ikatulong Timri" (63-0320), pahina 253
- [13] "Ang Ikapitong Timri" (63-0324E), pahina 536; 558; 575-577; 567
- [14] "Si Cristo Mao Ang Tinago sa Dios nga Gipadayag" (63-0728), par. 105-108; 205-207
- [15] "Pagbukas sa Tabil sa Dios" (64-0614M), par. 273-281
- [16] "Fiesta sa mga Trumpeta" (64-0719M), pahina 39
- [17] "Ang Ikaupat nga Timri" (63-0321), pahina 304
- [18] "Mga Pangutana Ug Mga Tubag" (64-0830E), P-Nu. 395, COD pahina 1161
- [19] "Pagtinguha Sa Pagbuhat ug Pag-alagad sa Dios" (65-1127B), par. 319
- [20] "Ako Nakadungog, Apan Karon Ako Nakakita" (65-1127E), par. 206

Spiritual Building-Stone No. 9 from the Revealed Word of this hour, compiled by:
Gerd Rodewald, Friedenstr. 69, D-75328 Schömburg, Germany
www.biblebelievers.de, Fax: (+49) 72 35 33 06

There's coming one with a Message that's straight on the Bible, and quick work will circle the earth. The seeds will go in newspapers, reading material, until every predestinated Seed of God has heard It. [Bro. Branham in „Conduct-Order-Doctrine“, page 724]